



Goj Majhung Gou



上林县大丰镇中心学校四年级 Veiz Yinhdungz/韦欣彤



Dauqngex hwnjdaej, gij goj gvedaengz saeh majhung gou ndeiri raixcaix, hawj gou riu ndaej dungxin bae.

Geiqndaej baez haenx gou lij mbouj caengz hwnj youwzyenz. Seizhah ngoenz ndeu, daxmeh cawx aen gvehoengz hung ndeu ma ranz, gou baez raen aen gvehoengz hung

haenx, couh dawz de dangguh aen giuz gvehoengz, lij heuh daxboh daxmeh caeuq gou doengzcae bek giuz, daxmeh riu dwk naeuz: “Neix dwg gvehoengz, mbouj dwg giuznaeng!” Gou ndatheiq dwk naeuz: “Daxmeh huk, neix couhdwg giuznaeng!” Gangj sat gou couh dawz hwnj gvehoengz yunghrengz gvang hwnj gwnz namh bae, cij dingqny “byaz” yienj sing ndeu, baez yawj, aen gvehoengz deng dekaq baenz song mbiengq, gou vueng lo, naeuz: “Giuznaeng dek lo, giuznaeng dek lo!” Daxboh daxmeh riu-

haha hwnjdaej, naeuz: “Neix mbouj dwg giuznaeng ya? Dwg gvehoengz, hahaha!” Gou ngaengwd lo, caekhaex baez naengh youq gwnz namh, raemxda baenz yaek doek okdaej, hujfofo dwk naeuz: “A, neix mbouj dwg giuznaeng, ndatheiq lai lo!”

Haeuj youwzyenz le, gou lijdwg yienghneix, hix gingciengz ok saeh ndeiri. Miz baez ndeu, lauxsae son raeuz doeg golwngyez, gou doeg loek haujlai baez, lauxsae mbouj naihfanz dwk naeuz: “Dingq ndei caiq doeg.” Baez neix, gou dingq cingcuj lo, sing

hung dwk doeg: “Dingq cingcuj caiq doeg.” Lauxsae baez dingq, baez ngaez le, ciepdwk riuahaha hwnjdaej, riu ndaej naj cungj hoengz liux, gou hix dwg baez ngaez, ciepdwk hix dwg riuahaha hwnjdaej, riu gaeuq le, lauxsae youh caiq son dou doeg geij baez.

Mboengq majhung haenx lij miz haujlai saeh, gangj hix gangj mbouj sat. Dauqngex hwnjdaej, miz eiqsei lailai ha!

(lauxsae son' gyauq: Vangz Gvei-yangh/黄桂香)

Gamjdoengh

贵港市覃塘区蒙公镇高占小学六年级 Veiz Mwz/韦墨


Fanhai bonj saw gaeuq seiz, daj ndaw doek mbawfaex henjroz ndeu okdaej.

Gou gungj hwet, gip hwnjdaej, neix dwg doeg haj nienzgaep seiz dahdoengzhag soengq hawj gou, youq gwnz sij miz “insik, baengzyoux!” Geiq mbouj ndaej dangseiz dwg mbouj dwg yaek siengj daej lo. Seizneix, baengzyoux gaengq cienjhag bae gizwnq doegsaw lo. Gwnz mbawfaex henjroz caeux couh miz riz raemxda baenz ndik baenz ndik. Youq gwnz seiqgyaiq lij miz cungj simcingz ndeu heuhguh gamjdoengh.

Miz haujlai nanz, gou gaengq lumz bae gij feihdauh gamjdoengh lo, dwg aen sim gou bienq caem lo, roxnaeuz aen sim gou caeux couh deng gij saeh nyapnyuk haenx ciemq rim bae?

Miz baengzyoux sij coenz vah ndeu soengq hawj gou: “Raeuz ngat ndang byaij gvaq, mbouj dwg mbouj miz yienzfaenh, cix dwg aenvih youq ndaw swnghhoz raeuz noix miz gamjdoengh.” Dwg ha, aen sim raeuz caiq mbouj lingz lo, raeuz gaengq mbouj caiq yungh sim bae baez di baez di rom gij gamjdoengh henz ndang. Raeuz veq gvaq de seiz, caiq ngeixdauq gvaqbae, cij fatyienh yenzlaiz raeuz caen dwg saetbae haujlai.

Cungj miz vunz ienq gwnz biengz saeh gamjdoengh gwj daej gwj noix. Hoeng, cijaeu raeuz caencingq laemxsim roengzdaej siengsiengj, gizaed, saeh gamjdoengh dauqcawq miz ya!



Lumjbaenz, doegsaw baeg lo, bohme hai aen mak ndeu gaem daengz dangqnae raeuz, dwg gamjdoengh; hozhawq hojsouh lo, baengzyoux soengq boi raemxraej ndeu daej hawj mwngz, dwg gamjdoengh; guh loek lo, bouxwnq yienzliengh mwngz, dwg gamjdoengh; doeknaiq seiz, ndaej daengz coenz vah lauxsae raeujrub haeuj rwz, dwg gamjdoengh; haisim seiz, baengzyoux gangj gij vuenyungz hawj mwngz rox, dwg gamjdoengh; bingzciengz, sou ndaej daengz faenh cukhoh iqetet, couhsuenq dwg limq va iq ndeu, mbaw faex ndeu, hix dwg gamjdoengh……

Gamjdoengh, lumj rumzcin ci gvaqdaej, raeujrub, gamjsouh rumzcin, ndaw sim raeuz cij bienq ndaej gvangqlangh youh seuqcingh.

Baengzyoux, hawj raeuz dauqngex gvaqbae gij saeh gamjdoengh geq hix geq mbouj liux haenx ba!

(lauxsae son' gyauq: Cinz Hungmeiz/覃红梅)

Geiq Saeh Youq Funghbanhgoeng Lauxsae “Gwn Caz”

“Liuz Ginjyui, lauxsae cingj mwngz bae funghbanhgoeng de ‘gwn caz’.” Vuz Cijmungz riu dwk doiq gou naeuz, de ngamq daj funghbanhgoeng lauxsae au cozyez dauqma. Gou doeksaetyat: “Dai lo.”

Gou gingciengz ngaiz heuh bae funghbanhgoeng lauxsae, cugciemh lau bae “gwn caz” lo. Gwn caz, couh dwg ndwn youq baihnaj cib geij boux lauxsae, ngaem gyauej roengz, song ga doxdep, song fwngz cuengq cingq nem sienqvaq, simhaw dingq lauxsae gangjgoj. Rwz gou dwg nding lumj makyungz nei, lij au seiz mbouj seiz ngaek gyauej hoizwngq, mizseiz lij au guhmieng dem, baihlaeng miz cib geij boux dingq dwk ne. Gou gijmaz cungj mbouj lau, couh lau ngaiz gyoengq lauxsae gangjgangj vixvix, caiq gya hwnj coenz ndeu: “Vei, youh daej lo, hagseng neix youh guh gijmaz la?” Gou roxnyinh vaihnaj dangqmaz, caenh siengj ndonj haeuj lajnamh bae. Seizneix, baez dingqgangj deng lauxsae heuh bae funghbanhgoeng, gou couh

roxdaengz haengjdingh mbouj miz gijmaz saehndei.

Gou snh lae byaij roengz laj bae, doq byaij doq naemj: “Baezneix youh dwg gijmaz saeh ne? Cozyez caengz sij liux? Gou genjcaz gvaq lobw, mbouj gojnaengz lumz ha. Roxnaeuz dwg lumz mbouj gajloek? Neix dauq miz gojnaengz, gou gingciengz mad dapanq loek bae danseih lumz le sij dapanq cingqdeng hwnjbae. Roxnaeuz dwg sij ndaej luenh lai? Bae yawjyawj caiq gangj ba.” Gou itloh naemj bae naemj dauq, ndaw sim hix yied daej yied vueng lo.

Youq rog funghbanhgoeng lauxsae, gou gvaengxgvax bae gvaengxgvax dauq, mbouj siengj byaij haeujbae. Doeklaeng, gou laemxsim lo, mou dai mbouj lau raemxgoenj rwed, fanjcingq youh ndoj mbouj ndaej, caeux di haeujbae caeux di liuxsah. Gou ndang nem bangxcienz iet gyauej daj geh dou caengndomq haeuj ndaw fuengz lauxsae bae, yawjraen gwnz daiz de cuengq miz song bonj cozvwnz, bonj baihgwnz yawj fungmienh couh rox dwg bonj gou lo. Gou sim naemj, dai lo, dwg mbouj dwg cozvwnz sij mbouj doiq daez ha? Yienghaenx couh ngaiz dauqcungz sij gvaq lo. Seizhaenx gou gaengcieng ndaej fajfwngz ok hanh liux, heiq hix supcuengq ndaej yied daej yied vaiq.

(Liuz Ginjsui raiz Ouha Caijfangh hoiz) (caengz sat)

